

# Powšitkowne WOZJEWJENJA

njedźelu, 13. awgusta 2017

## **Marije donjebeswzaća w Róžeńće**

Serbskorěčna Boža mša na swjedženju swjateje Marije donjebeswzaća wutoru, 15. awgusta, w Róžeńće budže w 9 hodź. Wšitcy wěriwi su wutrobnje přeprošeni.

## **Zelowy swjedzeń w Klóštrje**

Na klóšterskej zahrodze w Pančicach-Kukowje je njedźelu, 20. awgusta, tradicionelny zelowy swjedzeń. Ekumeniski nyšpor w 14.30 hodź., na kotrymž so zelowe kwěćele požohnuja, změjetaj propst Clemens Hrjehor z Kamjenicy a ewangelski wyši krajny cyrkwinski rada Ditrich Bauer z Drježdźan. Rjadniske sotry Božu službu sobu wuhotuja. Nyšporej přizamknu so koncert młodžinskeho orchestra z Leśnicy a zelowe wiki.

## **Zetkanje samostejacych w Smochćicach**

Samostejacy ze serbskich wosadow su na swoje přichodne zetkanje wutoru, 5. septembra, w 14 hodź. do Domu biskopa Bena w Smochćicach přeprošeni. Zajimcy njech so prošu hač do srjedy, 30. awgusta, w redakciji Katolskeho Posoła přizjewja, telefonowe číslo (0 35 91) 55 02 12. Štóz chce wotewzaty być, njech to prošu zdžěli.

## **Maćična akademija w Budyšinje**

Dr. Alexander Maxwell, stawiznar a docent na uniwersiće Victoria we Wellingtonje, Nowoseelandskej, přednošuje štwórtk, 24. awgusta, w 19.30 hodź. w Budyskim hosćencu „Wjelbik“, Žitna 7, k temje „Serbsčina w słowjanskim swěće: taksonomija a napodobnjenje“. Zastup na němskorěčny přednošk je darmotny. Wšitcy zajimcy su wutrobnje přeprošeni.

## **Serbske kemše w Drježdźanach**

Serbja w Drježdźanach, jich přiwuzni a přećeljo su wutrobnje přeprošeni na serbsku Božu mšu z fararjom Gabrišom Nawku njedźelu, 20. awgusta, w 16 hodź. do cyrkwe swjateho Antonija w Drježdźanach-Löbtauwe, Bünauska hasa 10. Po kemšach zetkamy so k serbskej bjesadze.

*Marjana Bubnerjec*

## **Na ekskursiji z jězbu na łódži swjateho Bena zeznać**

Na cyłodnjowsku ekskursiju z jězbu sobotu, 26. awgusta, na łódži po Łobju přeprošuja Katolska akademija Drježdźansko-Mišnjanskeho biskopstwa, Mišnjanska Ewangelska akademija a „Schlösserland Sachsen“. Za čas jězby z Drježdźan do Mišna pod temu „Pokład, kotryž njeje ze złota“ poskića so „rozmołwy na łubi łódže wo sakskim přenim swjatym“. Profesor dr. Josef Pilvousek z Erfurta a dr. André Thieme z Drježdźan předstajitaj wosobu biskopa Bena a rozestajenja w zwisku z jeho swjatoprajenjom za čas reformacije. Na wróćopuću budžetaj ewangelski krajny biskop dr. Carsten Rentzing a profesor dr. Christoph Böttigheimer wo wuznamje cyrkwe, hódnoće dźiwow a róli swjatych diskutować. W Mišnje je wopyt wosebiteje wustajeńcy wo swjatym Benje z wodženjom předwidžany. Zajimcy měli so hač do srjedy, 23. awgusta, na internetowej stronje Katolskeje akademije pod [www.ka-dd.de/GespraechAnDeck](http://www.ka-dd.de/GespraechAnDeck) přizjewić.